

## पिलिपिया पिलिपिया विस्वासुल्लुकं पौलुसना सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 60

पौलुस इद सिट्टितुन जेलने मत्तास्के पिलिपिया कलिसियातोर्क रासतोर. जेलनाल पेय्सि बेसता कबुर वेहना कबळतुन मर्रा सुख कियना इंचि ओना आसे. इका पौलुस इल्हा रासतोर गदा, “येसु किरिस्तु बोगांचतसोंटा तकलिपकु आनि इंदके नना बोगांचनसोंटा तकलिपकु, येसु किरिस्तुनपोर्रो विस्वासम इरताहाटी मीकगुडा वायावच्चु. असोंटस्के किरिस्तुनपोर्रो विस्वासम इरताहाटी दोर्कता तकलिपकुन पेनदा आसिर्वाद इनकुटु,” इंचि रासतोर.

पौलुस इद सिट्टि रासता इंकुंदि कारनम बतल इत्ते, पिलिपियाते, “मूसाना नियमकु वेहताप ताकट, हिलाकोंटे मीकु मुक्ति दोर्को,” इंचि तप्पुड बोदां कराहनोर मत्तुर. ओरा कराहमळ पौलुसुंक इस्टम हिलाका, “नय्कुनलेहका मुच्चनोरगटाल हुसारते मंडु,” इंचि वेहालय पौलुस इद सिट्टि रासतोर. अचोने आयका कस्टाल्क, दुक्काल्क वायिनागानि किरिस्तु हुपिस्ता हरदेने अंटोर विस्वासुल्क कलियसि कुसिते ताकना इंचिगुडा पौलुस रासतोर.

बगा बतल मंता

जोहार आनि परिचयम **1:1-11**

पौलुसना सतता परिस्तिर्ति **1:12-26**

किरिस्तुनतोनि पिस्सना पिस्वर **1:27-2:18**

तिमोति आनि इपपरदिसुनाहाटी पिलानकु **2:19-30**

पगातोरगटाल जेगर्ता मनना बारेमते **3:1-4:9**

पौलुस आनि पिलिपियाता ओना दंटागाह्क **4:10-20**

आकिरता बोदां **4:21-23**

पिलिपिया कलिसियातोर्क पौलुसना जोहार

1 पिलिपिया सहरते येसु किरिस्तुना लोप्पो मनना पेनदा अंटोर पवित्र लोकुल्लुकुंक, पेदूदाल्लुकुंक आनि अदिकारिल्लुकुनाहाटीं नना पौलुस, नावा दंटातोर तिमोति, मोमोट येसु किरिस्तुना सेवाकुल्लुकुम इद सिट्टि रासेक मंतोम.

2 मना पेनबाबानाहेंदाल, मना सामि येसु किरिस्तुनहेंदाल मीकु कुर्पा, सांति दोर्कि.

### पौलुसना पारतना

3 मीकुन नना बस्के-बस्के अयते मति कीतन, अस्के-अस्के पेनदुक दन्यवाद कीतन.

4-5 बेसता कबुर केंजसि विस्वासम कीता रोजुनाल अयते इदवेरदाकागुडा बेसता कबुरतुन वेहना नावा कबळते मिमेट नाकु तोळ मंतिर. अदुनहाटीं नना बस्के-बस्के अयते पारतना कीतन अस्के-अस्के वेल्लेन कुसिते मीवाहाटीं पारतना कीतन.

6 मीवा नड्डुम इच्चोन बेसता कबळतुन पेने सुस्व कीता. इद कबळ पुरागा आयनदाका, इत्ते येसु किरिस्तु मर्रा तिरियसि वायना रोजुनदाका पेने इद कबाटुन ताकिच्चेक ईरता इंचि नाकु पुरागा बरोसा मंता.

7 नना मीवा बारेमते इल्हा विचारम कियमळ बेसे आंद. बारित्ते, नना जेलने मत्तस्के आयि, बेसता कबुर वेहचि अवटे मत्ता निजमतुन हुपिच्चि कापाळसेके तिरियतस्के आयि, इव अन्नितवुने पेनदाहेंदाल कुर्पा दोर्कता, अवुने नावातोनि मिमेटगुडा तोळ मंतिर. अदुनहाटीं मिमेट इत्ते नाकु वेल्लेन पावरम!

8 किरिस्तु येसुनलेसीं ननागुडा मीकुन पावरम कीतन, इंचि नावा जीवा मीकुन हळानाहाटीं बस्केळक तनलाळता. दीनकु कुद्दु पेने गवाइ मंता.

9 मीवा पावरम बेस बेरस्सेक मनना, पेनदाहेंदाल मीकु बुद्धि, मंचि-सेड्डातुन एरपाट कियना तेल्वि बेरसना इंचि नना बस्केळक पेनदुक पारतना कीसेक मनंतन.

10 दीनहेंदाल मिमेट मंचि-सेड्डातुन एरपाट कीसि बेस पिस्वर पिसकिट. अस्के किरिस्तु वातस्के मिमेट अंटोरगुडा ओना मुन्ने नीतिमंतुल्लक आनि दोसेम हिलवोर आसि निलकिट.

11 मीवा पिस्वरते येसु किरिस्तु मत्ताहाटीं, मिमेट बस्केळक नीति कबाह्के कीसेक मंदना. दीनहेंदाल पेनदा पोरोल, कदर वेल्लेन बेरस्सेक दांता.

### बेसता कबुर बेसताहाटीं पौलुसना कुसि

12 नावा विस्वासुल्लुकुनिटा! मिमेट उंदि पोल्ले अर्तम कीकुंट, नावा पिस्वरते जर्गता अन्नि गटनां किरिस्तुना बारेमता बेसता कबुर बेरसालये सहायम आतां.

13 इल्हा जर्गताहेंकेन, किरिस्तुनाहाटीगे नाकुन जेलने वाटतुर इंचि राजवाडाते कावेल कियना अंटोर सिपाइल्कुंक आनि अगा मत्ता अंटोर लोकुल्कुंक तेळियसोत्ता.

14 इचोने आयका, नना जेलने मत्ताहेंका सामिनाहाटीं वेल्लेन मंदि विस्वास्कुंक दैरनेम दोर्कता. ओर बोर्के वेरियाकोटा वेल्लेन दैरनेमते किरिस्तुना बारेमता पोल्लेतुन वेहालय तयार आतुर.

15 अठेटाल इच्चुर कळक पोत्सि, नावा पोर्रोटा पगा तीरिचकुनालय किरिस्तुना बारेमते वेहचंतुर, इंका इच्चुर बारे बेस उद्देसमते वेहचंतुर.

16 बेस उद्देसमते वेहानोर, नावा पोर्रोटा पावरमहेंका अल्हा कीतुर. बारित्ते येसु किरिस्तुना बारेमता बेसता कबुर सल्लेम आंद इंचि हुप्सालये नना इगे मंतन इंचि ओर्क एरपाट मंता.

17 गानि नापोर्रो कळक पोत्सि, किरिस्तुना बारेमता पोल्लेतुन वेहना लोकुल्क मात्रम नना जेलने मननेके नाकु इरगा तकलिप आयागोम इंचि, ओरा सतता पायदाहाटीं अल्हा कीसंतुर.

18 अयना बतल आयो. बेस उद्देसमते आयि, कराब उद्देसमते आयि, अद बल्हे आयि! किरिस्तुना बारेमतेन वेहमळ जर्गसंता इंचि नाकु वेल्लेन कुसि आसंता. आनि नना इल्हेन कुसिते मनंतन.

19 बारित्ते मीवा पारतनां अल्हेन येसु किरिस्तुना आत्माता सहायमतोनि नाकु वायना ई कस्टाल्के नाकुन तप्पाकोटा पलाते पेचहंतां इंचि नाकु एरपाट मंता.

20 नाकु बसोटा परिस्तिति वायिना सिग्गु अर्रोन्, नना इदवेरादाका दैरनेमते किरिस्तुना सेवा कीतन, अल्हेने इंदकेगुडा कीसेक मंतन. नना हायिना-पिस्सिना नावा पिस्वरताहेंदाल किरिस्तुना पोरोल्लुन अंटोर कदर कियगोम इंचि नना वेल्लेन आसेते एदुर हळसेक मंतन.

21 बारित्ते नना पिस्संतन इत्ते किरिस्तुनाहाटींगे. नना हायिनागानि किरिस्तुनगेन दांतन इंचि हामुरगुडा नावा पायदातदे आंद.

22-23 इव रौडुन नड्डुम नना इरगा अचाहताप आतन. नना पिस्सि मत्ते पेनदाहेंदाल इनाम दोर्कनलायक बेस कबळ किया परंतन. इल्हा नना हामुरतुन पेरकाना मरि पिस्वरतुन पेरकाना नाकु बतले तेळियसेक हिल्ले. नाक अय्ते इद मेंदुलतुन होळसि किरिस्तुनगेन होंचि मंदकन बारे अनपिचचंता. बारित्ते इदे बच्चोनी बेस.

24 गानि नना मीवाहाटीं, पिस्सि मनमळ वेल्लेन अब्सरम.

25 नना पिस्सि मंचि, मिमेट विस्वासमते बेस गट्टि पळना इंका मीवा पिस्वरते मीकु बेस कुसि दोर्कनाहाटीं सहायम कीसेके मीवातोने मनंतन इंचि नाकु पूरा बरोसा मंता.

26 इल्हा नना बस्के अयते मर्रा मिहगा वांतनो, अस्के सामि नावाहेंदाल बतल-बतल अयते कीतोर अवुन केंजसि मिमेट येसु किरिस्तुन वेल्ले कदर हीकिट.

बेसता कबुरते वेहताप पिसालय पौलसना विनंति

27 बद बतले आयि, मीवा पिस्वर मात्रम किरिस्तुना बेसता कबुरते मत्ताप मनना. अस्के बतल आंता इत्ते, नना मिहगा वायिना, वायाकोन्ना मिमेट अंटोर उंदे आत्माते गट्टिगा बेस मंतरि आनि बेसता कबुरहाटीं अंटोर कलियसि पिस्सेक मंतरि इंचि व्हेतौरा हेंदाल नना केंजना.

28 बदे पोल्लेक आयि, बेसता कबुर वेहते तकलिप कियानोर्कुंक मिमेट वेरियमट, दैरनेमते मंटु. मीवा दैरनेमतुन हळसि, मोमोट नासडेम आंतोम, पेन ओर्कुन कापाळंता इंचि तकलिप कियानोर्कुंक तेळियंता. इद पेनदा कबळे आंद.

29 सिराप किरिस्तुन विस्वासम कियालये आयो गानि ओनाहाटीं तिप्पल्क अर्रालयगुडा पेन किरिस्तुनहेंदाल मीकु आसिर्वाद हीता.

30 नना अरता तिप्पल्कुन मिमेट हळतिर, इंदके केंजसंतिर आनि मिमेटगुडा अदे तिप्पल्कुने मंतरि.

## 2

वरोंक-वरोर बेस हळना

1 किरिस्तुनतोनि कलियसि मीवा दैरनेम बेसंता, ओना पावरमहेंदाल मीकु समादानम दोर्कता, मिमेट ओना आत्माते उंदि आतिर, इंका ओना दया मीतोनि मंता.

2 इव अन्नि पोल्लें निजमे गदा! अयते मीवा अंटोरा विचाराल्क बस्केळक उंदे मन्निकांटी, मिमेट वरोंक-वरोर उंदच्चोने पावरम कीम्पु, मीवा अंटोरद उंदे मनसु, उंदे उदूदेसम मनना. इल्हा पिसतिरित्ते नना निजमते पुरागा कूस मनंतन.

3 सतता पाय्दाताहाटीं आयि, पेद्दातनम हुप्सालय आयि बदे कबळ कियमट. गानि व्हेतौरा कदर कीसेके मनम कुदूदु ओरा मुन्ने सिन्नोड आसि मनना.

4 बोरें आयिर, सिराप सतता इस्टाल्कुना बारेमतेन आयो, गानि व्हेतौरा बारेमतेगुडा विचारम कियगोम.

येसु सामिनलेसी सिन्नागासि पिस्सना

5 येसु किरिस्तुना गुनम मत्तापे मीवा गुनमगुडा मनना.

6 ओर अय्ते कुद्दु पेने आंदुर, अयना पेनदालेसीं मनना विचारमगुडा किया हिल्लोर.

7 दान्क बदुल ओर ओनगा मत्ता अदिकाराल्कुन होळसीतोर. होळसिसि वरोर दासुनलेसीं आसि मनकन रूपमते इद बूमिपोर्रीं पुटतोर.

8 इल्हा मनकना रूपमते पुटसि ओनद ओर सिन्नगा कीकुल्लोर. इच्चोने आयका पेनबाबाणा इच्चातुन पूरा कियालासि कृसुनपोर्रीं जीवातुनगुडा हीतोर.\*

9 अदुनहाटीं पेन ओन अन्निटवुंकन्ना पेद्दोड कीसि ओना पोरोल्लुतुन अन्नि पोरोलीकन्ना पेद्दा कीता.

10 बारिल्ले, मब्बुन पोर्रीटव, बूमि पोर्रीटव, बूमि हिळतव अन्नि येसुना मुन्ने टोंगरां ऊनसि ओन्के मोळकाना.

11 इंका “येसु किरिस्ते सामि आंदुर,” इंचि हरेक नाल्के ओप्कुनगोम. इल्हा पेनबाबांक कदर दोर्कना इंचि अल्हा कीता.

### इद बूमिपोर्रीं वेडसीलेसीं पिस्सट

12-13 अदुनहाटीं नावा पावरमगल्ला विस्वासुल्लुकिना! नना मीकु वेहनद बतल इल्ले, नना मीवातोनि मत्तस्के बस्केळ्ळक मिमेट नना वेहतापे ताकतित. इंदके नना मीवातोनि हिलाकोन्ना गानि अस्केटदानकन्ना एक्को जेगर्ताते सामिना आदेसकुन पीसि ताकट. पेनदा इच्चा परकारम बतलन्ना कीकुनगोम इंचि मीवा मनसुने वाता इल्ले, अद इच्चा पेने मीवा मनसुने वाटता. अदुन पूरा कियालय गावाले मत्ता ताकतगुडा मीकु पेने हीता. इंचि पेनदुन बेस कदर कीसेके, वेरें कोद्दिगा पेन हीता मुक्ति परकारम मत्ता कबाहक कीसेके पिस्सट.

14 बद कबळ कियिनागानि गुल्गाकोटा, जगडम कियाकोटा कीम्टु.

15 अस्के मिमेट बतले दोसेम हिलवा बेस लोकुल्लक आकिट. तप्पुड कबाहक किय्याना ई दुनियाता लोकुल्लकुना नड्डुम आनि पापि लोकुल्लकुना नड्डुम मिमेट बतले दोसेम हिलवोर आसि पेनदा मर्क-मियाहकुनलेसीं मंदकिट. इंका मिमेट हीकटते पिस्वर पिस्सना लोकुल्लकुना नड्डुम पोल्तना वेडसीलेसीं दिसकिट.

16 पिस्वर हियना पेनदा पोल्लेतुन गट्टिटगा पीसि ताकट. इदुना हेंदाल किरिस्तु वायाना रोजुने, मीवाहाटीं नना कीता कस्टम, वितलाटा एर्तम आयाहिल्ले इंचि कुसिते वेहंतन.

\* 2:8 पेद्दा-पेद्दा तप्पुक कीतोर्कुके ई कृसता सिक्सा हीतुर.

17 पेनदा सेवा कियनाहाटीं मिमेट उंदि मोक्कुनलेहका आसि वेल्लेन तिप्पल्क अरसंतिर. इंदंता मीकु पेनदापोर्री वेल्लेन विस्वासम मत्ताहेंका आसंता. अदुनहाटीं इसोटा मीवा मोक्कुनतोनि नावा जीवा हीसि नेत्तुर वारागिच्चालयगुडा नना पजोळ्क होन्नोन, गानि वेल्लेन कूस मनंतन.

18 इल्हा मिमेट इरगा कूस मंडु, मीवातोनि ननागुडा कूस मनंतन.

तिमोति आनि इपपरदिस ईर बेस सेवाकुल्क आंदुर

19 तिमोतिन मिहगा बिरानेन लोहकन इंचि नना सामि येसुनाहेंदाल आसे पळसंतन. ओर मीवा बारेमता कबुर नाकु वासि वेहनुर, अस्के नाकु इरगा कुसि आयार.

20 मीवा बेसताहाटीं मनसुनाल चिंता कियानोर नहगा ओन्क तप्पा वेरे बोरे हिल्लोर.

21 अंतोर ओर-ओरा कबाहकुने मुळ्गिसि मंतुर, येसु किरिस्तुना बारेमते विचारम कियानोर बोरे हिल्लुर.

22 गानि तिमोति असंतोर आयोर. वरोर मर्री बाबनतोनि कलियसि कबळ कीताप, ओर बेसता कबुर वेहना सेवाते नावातोनि इमानदारिते कस्टपळतोर. ओना गुनम बसंतदो मीकु बेस एरपाट.

23 जेलनाल नाकुन होळसीतुरो, होळसुरो इद पोल्ले तेळियतारित्ते ओन नना मीहेके लोहकन इंचि आसे पळसंतन.

24 ननागुडा बिरानेन मिहगा वांतन, इंचि सामिनपोर्री नाकु पुरागा बरोसा मंता.

25-26 नाकु अक्सरम अरतस्के सहायम कियनाहाटीं मिमेट इपपरदिसुन नाहेके लोहतिर. बेसता कबुर वेहनेके वरोर सिपाइन लेहका ओर नावा तोळ मत्तोर आंदुर, ओर नावा तम्मुनसंतोर आंदुर. गानि ओन मर्री मीहेके लोहना इंचि नावा मनसु मंता. मीकुन ह्वाललय ओर इरगा गाबर आसंतोर. ओर बिमार अरता संगति मिमेट केंजतिर इंचि ओन्क तेळियतस्के ओर वेल्लेन नाराज आतोर.

27 ओर बिमार अरिं हायानाल आसि मत्तोर इद निजमे! गानि पेनदा दया ओनपोर्री मत्ताहेंका ओन्क बतल आयाहिल्ले. ओर बिमारताल बेस आयाकोटा मंचि मत्ते, नावा दुक्कम इंका बेरसि मनवळ इंचि पेन नावा पोर्रीगुडा दया हुपिचि ओन बेस कीता.

28 अयते ओन मिहगा बल्हैना लोहना इंचि नना विचारम कीतन. ओर मिहगा वाते मिमेट ओन ह्ळसि कूस आकिट, अस्के नावा चिंतागुडा तक्को आंता.

29-30 मिमेट नावाहाटीं किया पर्वा सेवातुन ओर ओना जीवाक तेगिचि पूरा कीतोर. किरिस्तुना कबळतुन पूरा कियनाहाटीं ओर हायालय आसि मत्तोर. अदुनहाटीं ओर मिहगा वातस्के मावा दंटाता विस्वासि इंचि सामिना पोरोलते मिमेट ओन बेस कल्पकुंट. ओनालेसी सेवा कियना हरेक मनकना बेस कदर कीम्टु.

### 3

विस्वासमतेन नीतिमंतुल्क आया परांतुर

1 विस्वासुल्कुनिटा! आकिरते नना इंकुदि मल्का वेहांतन, पेनदापोर्रोटा मीवा विस्वासमते मिमेट कूस मंटु. रासता पोल्लेंगें ऊके-ऊके रासालय नाक बतल तकलिप आयो. बारित्ते इव पोल्लें मीकुन तप्पुड बोदानाल कापाळंतां.

2 अदुनहाटीं तप्पुड कबाहक कियना नयकस्केल गुनमतोरगटाल जेगर्ता मंटु. कतना\* रिवाज कीतेन नीतिमंतुल्क आंतुर इंचि ओर कराहंतुर.

3 गानि मनकालोरा कबाहकुनपोर्रो बरोसा इरताहेका मनाकु मुक्ति दोर्कता इंचि आयो. येसु सामि मनाकुन पिसागोटतोर इंचि ओन्क मनम बस्केळक कदर हीं तोम. अदुनहाटीं पेनदा आत्मा वेहताप दान मोळकानोरम मनमे निजम कतना आतोरम आंद, ओर आयुर.

4 बोरन्नागिंटा सतता कबाहकुनपोर्रो बरोसा इरसि पोंगसेके तिरियानय्ते, नावा कबाहकुनपोर्रो बरोसा इरसि पोंगालय ओनकन्ना एक्को कारनाल्क नहगा मंतां.

5 अद बल्हा इत्ते, नना पुट्टा एनिमिदि रोजकुंके नावा कतना आता, नना इस्राएल देसेमते पुट्टा पिच्चर यहुदि जातितोन, बैजामिनना गोत्रमतोन आंदुन, मूसाना नियमकुन उंदि पोल्लेगुडा तप्पाकोटा पीसि ताकाना परिसिल्कुना गुंपुनोन आंदुन, इब्रानि कुंटुबते पुट्टा इब्रानि मनकन आंदुन.

6 जोसने वासि, नना कलिसियातुन वेल्लेन तकलिप कियुंदुन. इंका मूसाना नियम परकारम नीतिते ताकमळते अय्ते नना बदे तप्पु किया हिल्लेन.

7 इव अन्नि पोल्लें नाकु वेल्लेन पायदातव इंचि नना मुन्ने इनकुनुंदुन. गानि इंदके किरिस्तु नावाहाटीं कीतदुन मुन्ने, अव अन्नि एर्तीम इंचि नाक तेळियसोत्ता.

\* **3:2** कतना यहुदि आनि मुसलमान लोकुल्कुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इंसंटा रिवाज कीते पेनतोन करार कीताप इंचि ओर नम्मंतुर.

8 अचोने आयाका, नावा सामि येसु किरिस्तुन एरपाट कीतदे पेद्दा पोल्ले आंद. कळमतव अन्नि अट्टि पोल्लेगें, येसु किरिस्तुन दोर्किच्चकुनालय अव अन्निन नना लेक्का किय्योन कचरा इनकुंतन.

9 इंका किरिस्तुनतोनि उंदि आसि मनमळे नावा उदूदेसम. मूसाना नियमपोर्रो बरोसा कीसि नीतिमंतुड आया पराहिल्लेन, गानि किरिस्तुनपोर्रो विस्वासम कीताहाटी पेनदा नदरते नीतिमंतुड आतन.

10-11 येसु किरिस्तुन आनि ओर हासि मर्रा जीवाते तेदता ताकततुन तेलपिचकुनना इंचि नाकु मंता. ओर बोगांच्ता तकलिपकु आनि हामुरतुनगुडा बोगांचि, ओनलेह्केन नाकु आयगोम. बल्हा अघ्नागानि उंदि रोजु पेन नाकुन हामुरताल जीवाते तेहंता इंचि नावा आसे.

### पेनदा इनामतुन दोर्किच्चकुनालय वित्सेक मनना

12 पोर्रो बव पोल्ले अय्ते रासतन, अव नावा पिस्वरते पूरा आतां इंचि वेहोन. अगा एवतन इंचि इनोन, गानि बगा एवालय अय्ते किरिस्तु नाकुन पीतोर, अगा एवालय नना वित्सेक मंतन.

13 विस्वासुल्कुनिटा! नना अगा एवतन इंचि विचारम किय्योन, गानि इद कबळ कीतन. पज्जो जर्गता पोल्लेन मति मरंस्सि, मुन्ने जर्गना पोल्लेन अंदकुनालय वित्सेक मंतन.

14 स्वर्गमतगा एवानोर्कुंक पेन बद इनाम हीतन इंचि केयता, अद इनामतुन येसु किरिस्तुनाहेंदाल दोर्किच्चकुनालय नना वित्सेक मंतन.

15 अदुनहाटी मना लोप्पोटाल विस्वासमते बेस बेर्सतोरम मनम अंटोरम, इव अन्नि पोल्लेना बारेमते उंदासि मंदकोम. ओक्कला बद्दना पोल्ले बारेमते मीवद वेरे बतलन्ना विचारम मत्ते, अदुनगुडा पेन मीकु समजांचि वेहंता.

16 अघ्नागानि मनम मात्रम पेन मनाकु इदवेरादाका हूपिस्ता सत्तेमतुन पीसे ताकसेक मनना.

17 विस्वासुल्कुनिटा! मिमेट अंटोर उंदासि, नना ताकतापे ताकट. इंका मोमोट वेहताप बोरे अय्ते ताकसंतुरो, ओर्कुन हळसि मिमेट करियट.

18 बारित्ते वेल्लेटुर लोकुल्क किरिस्तु कूसुनपोर्रो हातोर इत्ता पोल्लेक विरोदमते ताकसेक मंतुर. ओर किरिस्तुना कूसता पगातोर आंदुर. ओरा बारेमते नना मीकु बच्चुंगो मल्कां वेहतन, इंदकेगुडा अळसेके वेहासेक मंतन.

19 आकिरते ओर नासडेम† आयानुर, ओरा पिस्वर पीटाहाटीगे. सिग्गु होनना कबाहक कीसेके ओर पेद्दातनम वेहकुंतुर. दुनियाता पोल्लेन पौरिन ओरा मनसु मनंता.

20 गानि मनम अय्ते ई दुनियाता लोकुकुम आयोम, मनम स्वर्गमता लोकुकुम आंदुम. अगाटाले मनाकुन पिसागोटानोर सामि येसु किरिस्तु वांतोर इंचि मनम ओना एदुर हळसेक मंतोम.

21 अन्नितवुन ओना कय्दा हिळु इर्रना ताकत ओनगा मंता. ओर वातस्के आ ताकततोने मना नासडेम आयाना इद मैदुलतुन बदलांचि ओर हासि तेदतस्के ओन्क दोर्कतसोंटा महिमाता मैदुललेसी कियानुर.

## 4

बस्केळ्ळक कुसिते मनना बारेमते पौलुस कराहंतोर

1 अदुनहाटीं विस्वासुल्कुनिटा! मिमेट सामिना विस्वासमते गट्टिगा मंटु. मीकुन ह्ळागोम इंचि नावा जीवा बच्चोरो तनलाळसेक मंता. नावा पावरमतोर मिमेटे आंदिर. किरिस्तु वातस्के, नना नावा कबळ महतन इंचि हुप्सानोर मिमेटे आंदिर.

2 युवादिया, सुंतुके अक्काहकुनिटा मिमेट येसु किरिस्तुनोर आंदिर, अदुनहाटीं मिमेट जगडाल्क होळसि सामिना लोप्पो उंदि मनसुने मनना इंचि नना विनंति कीसंतन.

3 नावा दंतातोना! अव रोंड मुर्ताहक जगडाल्क होळसि उंदासि मनालय निमे सहायम कीम इंचि नीकु विनंति कीसेक मंतन. बारित्ते किलेमेन्स आनि नावातोनि कबळ कियानोरतोनि कलियसि अव रोंड मुर्ताहक बेसता कबुर वेहालय वेल्ले कस्टपळतां. अल्हा कबळ कियानोरा पोरोल्क पेनदागा मनना बस्केळ्ळक पिस्सना पिस्वरता पुस्तकमते रासि मंता.

4 मिमेट सामिना लोप्पो बस्केळ्ळक कुसिते मंटु, नना मर्रा इदे पोल्ले वेहासेक मंतन मिमेट बेस कुसिते मंटु.

5 मिमेट सादा-सिंपलतोर इंचि अंटोर्क तेळियनाल पिस्सट, बारित्ते सामि वायाना वेला दग्गेरा मंता.

† 3:19 नासडेम नासडेम इत्ते, नरकमते बस्केळ्ळक पोत्तना तळमिते मंचि तनलाळसेक मनमळ.

6 बदे पोल्लेक पिक्किर कियमट, गानि अन्नि पोल्लेनहाटीं पेनदुक पारतना कीसि मीवा अक्सरमतुन वेहाट्ट, दन्यवाद कीसि दान तल्कट.

7 अस्के बोरै अर्तम किया परबसोंटा सांतितुन पेन मीकु हीता. मिमेट येसुनोर आताहाटीं अद सांति मीवा मनसुन, विचाराल्कुन बेस कापाळसि इर्ता.

8 विस्वासुल्कुनिटा! आकिरते इंकुंदि पोल्ले वेहानद मंता. अद बतल इत्ते, बव पोल्लें अय्ते सत्तेम, तल्सकुननालायक मंतां, अव पोल्लेना बारेमतेन विचारम कीसेक मंटु. इत्ते, बरोसालायक पोल्लें, कदरलायक पोल्लें, नीतिता पोल्लें, पवित्र पोल्लें, कुसिता पोल्लें, सोबांचना पोल्लें इवे पोल्लेना बारेमते विचारम कीसेके मंटु.

9 मिमेट नावाहेंदाल करियसि दोर्किचकुत्ता पोल्लें, केंजता पोल्लें, आनि हूळता कबाहक इव मत्ताप ताकट. अस्के सांति हियना पेन मीकुन कापाळंता.

### पिलिपिया कलिसियातोरक पौलुसना जोहार

10 मिमेट मर्रा उंदि मल्का नावा बारेमते विचारम कीसि नाक सहायम कीतिर. अदुनहाटीं नना सामिना लोप्पो वेल्लेन कूस मंतन. इल्हा सहायम कियना इंचि मिमेट मुन्नेन विचारम कीसि मत्तिर, गानि मीकु मोका दोर्काहिल्ले.

11 नाकु बदनदो अक्सरम मंता इंचि नना इल्हा इंचेक हिल्लेन. बारित्ते बसोंटा परिस्तिति वायिनागानि कुसितेन पिसमळ नना करियतन.

12 बतले हिलवस्के बल्हा पिस्सना, मत्तस्के बल्हा पिस्सना इद इंका नाक तेळियता. बसोंटा वेला वायिना, बसोंटा परिस्तिति वायिना, कर्वेस्सि मनिना, पीर निंडिस मनिना, वेल्ले मत्तस्के बल्हा मनना, तक्को मत्तस्के बल्हा मनना इव अन्नि नना करियतन.

13 किरिस्तु नाक ताकत हीसेक इंचि, बसोंटा परिस्तिति वायिनागानि नना अन्नि किया परांतन.

14 बतलन्ना आयि, मिमेट नावा तकलिपते सहायम कीतिर, बेस कीतिर.

15 नना सुम्बुने बेसता कबुर वेहचि मेसिडोनिया इनना मीवा एरियाताल होत्तन. अस्के मिमेट पिलिपियाता विस्वासुल्क तप्पा, वेरे बदे कलिसियातोर नाक सहायम किया हिल्लुर. इद पोल्ले मीकु एरपाटे.

16 इल्हेने नना बस्के अय्ते तेसलोनि सहरते मत्तन, अस्केगुडा अक्सरम मत्तस्के नाक मिमेट वेल्लेन मल्कां सहायम कीतिर.

17 नाक मीहेंदाल सहायम गावाले इंचि आयो, गानि मिमेट कियना बेसता कबाहकुनहेंका मीकु पेनदाहेंदाल आसिर्वाद दोर्कसेकेन मनना इंचि नावा विचारम मंता.

18 नहगा अन्नि मंतां, नाक बच्चोर अयते गावाले दानकन्ना एक्को मंतां. मिमेट इपपरदिसुनतोनि लोहता सहायम नाक दोर्कता. अवुनतोनि नावा अब्सराल्क अन्नि तीरतां. बल्हा अयते मोक्कु हीतारित्ते पेन दाना गब्बु एतंता, अल्हेने मिमेट लोहतवुन पेन कुसिते एतकुंता.

19 नना सेवा कियना पेनदागा मनाकु गावाले मत्तादुंकन्ना एक्को संपत्ति मंता. अदुनहाटीं मनाकु बतल अब्सरम मनिनागानि, मनम किरिस्तु येसुना लोकुल्क आताहाटीं पेने दाना महिमाहेंदाल अदुन पूरा कींता.

20 मना पेनबाबान युगा-युगाल्कुनदाका स्तुति कीकोम. आमीन.

21 येसु किरिस्तुन विस्वासम कीतोरे अंटोरे पेनदा लोकुल्कुं क नावा जोहार. इगे नावातोनि मत्तोरे विस्वासुल्कगुडा मीकु जोहार वेहसेक मंतुर.

22 इग्गेटा पेनदा लोकुल्क अंटोरे, कास कैसर राजांक सेवा कियानोरे विस्वासुल्क मीकु जोहार वेहसेक मंतुर.

23 मना किरिस्तु येसु सामिना कुर्पा मीवा आत्मातोनि मन्निकांटी.

**Pavitra Polle**  
**Aheri Gondi: Besta Kabur (Bible)**

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

---

PDF generated using Haiola and XeLaTeX on 1 May 2025 from source files  
dated 1 May 2025

856c9a76-2de1-5675-855a-28be9a349068